

# ہیٹھ وگے دریا



مشتاق صوفی

Academy of the Punjab in North America: <http://www.apnaorg.com>

پٹھ وگے دریا

خالی

# پٹھ وگے دریا

(کافیاں)

مشتاق صوفی

سازجہ

(چھاپن دا حق لکھاری دا)

پٹھ وگے دریا	:	ناں کتاب
مشتاق صوفی	:	لکھاری
سعید ابراہیم	:	مکھ پنا
ساجد عطاء	:	کمپوزنگ
جولائی 1974ء	:	پہلی وار
اگست 2008ء	:	دوجی وار
100/-	:	مئل
شرکت پریس لہور	:	چھاپا خانہ

ISBN: 978-969-8957-67-4

## سانجھ

دوجی منزل مفتی بلڈنگ 17/31 ٹمپل روڈ، لہور

فون: 042-7355323 فیکس: 042-7323950

ای میل: sanjhpk@yahoo.com

اُچے بُرج لہور دے تے پٹھ وگے دریا

خالی

11	تیرا ساوا جو بن وے سے نی	-1
12	نین پیا چائن دا زور	-2
13	ڈھولن وے ساڈا کنڈا ہانہ	-3
14	آوس ڈھول ساڈے تن	-4
16	اساں تے تاں راوی سئگی	-5
18	آمانی ساڈی جھوک وسا	-6
20	بھوچھن دا رنگ رتا لال	-7
21	مانی وے کھجیاں تے پھل	-8
23	مانی وے پتتاں تے مل	-9
24	جھوکاں تے بدلاں دی گج	-10
26	چھیڑو کوئی آن چھیڑیا راگ	-11
28	سر تے رتی قہر ہنیری	-12
29	چڑھ چتاں ایہہ اکھیں لگیاں	-13
31	ہتھ پیلے پتلاں دے پتے	-14
33	مانی وے راتاں چانیاں لگھ گنیاں	-15
34	چر ساڈے باغاں وچ ہرنا	-16



35	ساڈی واری امب نہ چلے	-17
37	ہرے باغاں دے گالھڑ مالی	-18
39	ماہی وے تیری وے بار	-19
41	مکدی نہیں جُتیاں دی دُوری	-20
42	فجر تھئی آتیاں نہ بانگاں	-21
43	روہی وچ تلیاں بلدیاں	-22
44	بھوں گتیاں رُتتاں کالڑیاں	-23
45	اڈ کوٹھے توں گُوڑے کاواں	-24
46	لہو ساڈے دی رنگت گئی	-25
47	لک پتلا سینہ بھارا	-26
49	واڑی وچ پکٹیاں پتیاں	-27
50	اتواری کنکاں گدریاں	-28
51	پر نی نہ سکتیاں کواریاں	-29
52	سانول نہ واگاں موڑیاں	-30
53	روہی تے وٹھتیاں کنیاں	-31
54	دیس رہیاں پردہسی ہو	-32
55	آسکلی دیا ڈھولا	-33
57	تن تیتیا مکڑی دا جالا	-34
58	مزے ثواب گناہ دے پھوکے	-35
60	اج من بے مستی مست پئی	-36
62	گئے رُڑھ پتھن دریاواں دے	-37
64	دل بَر دے رہے	-38
66	موت کھلینے سانوں سونہہ دے جیون دی	-39
68	سینے ککھ وہاں دے رولن	-40
69	ویلا سچا ڈھولنا	-41

70	ساڈیاں گلداناں وچ پھکیاں کلیاں وے	-42
71	کیہا جو بن دا مان	-43
72	کالی کوئل کالی لوک نہ مار	-44
74	دُعا ساتھوں نہ جاندی منگی	-45
76	اَن چکھیا جو بن گھسدانی	-46
77	کالے کرشناں تیریاں نسلان پھتیاں وے	-47
78	دھمی لال پہاڑاں گھٹی	-48
80	ساڈے ویلے لگی پیوند گاباں نوں	-49
82	سر ساڈے تے چام چڑکاں	-50
83	نیناں کتھوں سفنے مانن	-51
85	کالے پتر اناراں دے	-52
87	چچو چچ گنڈیریاں	-53
88	بن ماہی جو بن بدرنگا	-54
89	تاگھیں وسدا ساون ساون	-55
91	شالا دل عاشق نہ تھیوے	-56
93	آ ماہی تینوں سینے لاواں	-57
94	نیلیاں بدلاں جھڑیاں لائیاں	-58
95	نیناں وچ جاگے اسمان	-59
96	سانول کون دلاں نوں موڑے	-60

خالی

## تیرا ساوا جو بن و سّے

تیرا ساوا جو بن و سّے

لوا گلاب تیرے ساہ اندر رمزرتاں دی دسّے

تیرا ساوا جو بن و سّے

نیلے نین اسماناں وچوں غیبی سورج و سّے

تیرا ساوا جو بن و سّے

ساڈے ٹھردے سینے تے بدرنگی چھاں پئی کسّے

تیرا ساوا جو بن و سّے

تن تیرے دی رتی خشتبو  
رت ساڈی وچ ہسے  
تیرا ساوا جو بن وسے

## نمین پیا چانن دا زور

سکدا ماس وِلاوے لہو نال، ناں تیرے دا رتتا شور  
نمین پیا چانن دا زور

کھاگڑ ہڈیاں دے بئیاں توں، نگھ تاں جاسی کھر کھور  
نمین پیا چانن دا زور

دُھپ چھاں ہک رنگے رنگ گھلسن، رُڈا ڈھی دو رنگی ٹور  
نمین پیا چانن دا زور

باہر بنیریاں تے کال گُوکن اندر کھمب کھلارن مور  
نمین پیا چانن دا زور

## ڈھولن وے ساڈا کمبدا ہانہہ

ڈھولن وے ساڈا کمبدا ہانہہ

چٹے دن تے کالیاں راتاں، چکھے ٹھلہدی چان چھاں  
ڈھولن وے ساڈا کمبدا ہانہہ

تن دے پیلے ماس وچالے، دھکھ پیا تیرا جاگدا ناں  
ڈھولن وے ساڈا کمبدا ہانہہ

اندر باہر چپ دی روہی، ایہہ کوکن دی تھاں  
ڈھولن وے ساڈا کمبدا ہانہہ

جھوک بجن دی کتھے بنسی؟ سٲک گئی بھری چنانہہ  
ڈھولن وے ساڈا کمبدا ہانہہ



## آوس ڈھول اساڈے تن

آوس ڈھول اساڈے تن

ساویاں ناڑاں دے پوہ وچوں کورا کھڑدا جُشہ بھن  
آوس ڈھول اساڈے تن

کالیاں چھتتاں چڑھے بنیریاں پُٹھا ٹنگیا سورج بٹھ  
آوس ڈھول اساڈے تن

خشبوتیں کوئی ماس نہ چکھے تورا یا بھاویں نیریا من  
آوس ڈھول اساڈے تن

بھونئیں تے کھوجی کھرے سچھان؟ ساڈیاں نیناں لگی سٹھ  
آوس ڈھول اساڈے تن

کیہڑے ناکھے ان جھلے موسم دا متھرا کملا چن  
آوس ڈھول اساڈے تن

## اساں جے تاں راوی سَکّی

اساں جے تاں راوی سَکّی

سَکّی چُپیاں پیتاں تے، اتوں جھڑی ساون دی مَکّی  
اساں جے تاں راوی سَکّی!

اساناں تے بھانہڑ مچدا، ہتھ ساڈے وچ مسی ہُتھی  
اساں جے تاں راوی سَکّی

جگے کاگ پلوتے دیندے، بال سویرے پاڑن رُکھی  
اساں جے تاں راوی سَکّی

لال سمندراں دے سر اُتے بھُوریاں بھنجاں لائی بُتھ  
اساں جے تاں راوی سُنّی

کیہڑیاں سُنّھ طیلوِیاں وچ ماہی وے تیری نیلی لُئی  
اساں جے تاں راوی سُنّی

## آماہی ساڈی جھوک وسا

آماہی ساڈی جھوک وسا

جیہڑی دھمی آکھنی این توں سانوں تاں اج آکھ سنا  
آماہی ساڈی جھوک وسا

ادھ سیالے جم کھلوتی، رت وچ ٹردی رتھی بھاء  
آماہی ساڈی جھوک وسا

بُنگاں نال اسساں پانی دیندے، وڈھ وڈھ ویندی بگڑی جا  
آماہی ساڈی جھوک وسا

سینیاں والے جھاگ ویکھنیں گاراں دے کالے دریا  
آماہی ساڈی جھوک وسا

واگاں والے سر آچڑھسن اُسرے سکھ طیلے ڈھا  
آماہی ساڈی جھوک وسا

## بھوچھن دا رنگ رتّا لال

بھوچھن دا رنگ رتّا لال

پھٹّی پُئیدیاں سانولیاں، پئے اڈن کالڑے وال  
بھوچھن دا رنگ رتّا لال

دنداں نال انگوٹھے چو پن کوٹھیاں تے چڑھ لیسے بال  
بھوچھن دا رنگ رتّا لال

چن تے سورج توں نہ ٹھدا نیناں دا بے رتّا سال  
بھوچھن دا رنگ رتّا لال

رُتَاں ہور پکیرا کیتا رت چڑھیا بھورا زنگال  
بھوچھن دا رنگ رتتا لال



# ماہی وے کھجیاں تے پھل

ماہی وے کھجیاں تے پھل

ماس دیاں بٹیاں تے سَکدا، ساہ دا چٹا تھل  
ماہی وے کھجیاں تے پھل

سج جتیاں دے تالواں اندر دائیاں کھورن پھکا کل  
ماہی وے کھجیاں تے پھل

پیراں وچ کنڈے پیا گڈے ان وا گیا کوئی بے رنگ جھل  
ماہی وے کھجیاں تے پھل

چوہے نچدے گھر اندر، اساں باہر لیا ہرناں نوں ول  
ماہی وے کھجیاں تے پھل

کارے تے اساں ٹھلھ نہ سکے ماپیاں دا سنگ مل  
ماہی وے کھجیاں تے پھل

## ماہی وے پتتاں تے مل

ماہی وے پتتاں تے مل

کالی راتیں ٹھلھ ڈٹھا ای ہُن تاں چٹے دن توں ٹھلھ  
ماہی وے پتتاں تے مل

اَن وگے دریا دے جھاکے ریڑ وچ اساں گڈے تِل  
ماہی وے پتتاں تے مل

جاں چگن دا موسم پرتیا چڑھی اسمانی کالی ہل  
ماہی وے پتتاں تے مل

چڑی تے اُگ لہو چھیدے کہے سِنے کنڈیا لے رکل  
ماہی وے پتتاں تے مل

## جھوکاں تے بدلاں دی گج

جھوکاں تے بدلاں دی گج

اساناں دے نیناں دُھکھدے غبیاں دے نال رنج  
جھوکاں تے بدلاں دی گج

ونج دریاں کالیاں ڈبیاں بیلیاں وچوں بھج  
جھوکاں تے بدلاں دی گج

ریتا رنگے ہسٹر وچ سبھ ستے سینے جھکھو کج  
جھوکاں تے بدلاں دی گج

چڑھی ہوا دے ڈھول جگاؤن نیلیاں نیناں اندر وچ  
جھوکاں تے بدلاں دی گج

باہر نکل کے کن من چکھو مٹھے مینہہ دی اج  
جھوکاں تے بدلاں دی گج

## چھیڑو کوئی اَن چھیڑیا راگ

چھیڑو کوئی اَن چھیڑیا راگ

ڈوریاں بُسیاں اندر جاوَن ساہ دے پر دے جاگ  
چھیڑو کوئی اَن چھیڑیا راگ

گلیاں دے ہتھاں تے رکھو رت چان دے لاگ  
چھیڑو کوئی اَن چھیڑیا راگ

کوٹھیاں اُتے بانگاں دیندیاں چٹے تھی گئے کاگ  
چھیڑو کوئی اَن چھیڑیا راگ

جھولیاں والیاں کتھے سُتیاں، جاگ کھلوتا سرہوں ساگ  
چھیڑو کوئی اَن چھیڑیا راگ

سرتے ٹنکیاں پَھتتاں وچوں تھک پئے سٹن مچھرے ناگ  
چھیڑو کوئی اَن چھیڑیا راگ

تازی ہنکاں مارن، لگے ہتھ وچ ٹرٹ گئی واگ  
چھیڑو کوئی اَن چھیڑیا راگ

کیہڑا سجرے میوے چکھسی اڈنے ریت سمندر جھاگ  
چھیڑو کوئی اَن چھیڑیا راگ



## سر تے رتی قہر ہنیری

سر تے رتی قہر ہنیری

چھکیاں ساہواں اندر کھنڈ گئی تن گو ہے دی ڈھیری  
سر تے رتی قہر ہنیری

بوٹا لاون دی سکت اندر اساں جوانی سڑکیں کیری  
سر تے رتی قہر ہنیری

پکیاں سڑکاں تے بھاء لاون چڑھسی کوئی اسوار وچھیری  
سر تے رتی قہر ہنیری

ست رنگ پتھراں دے کنئیں کوئی آ گؤ کے رمز چنگیری  
سرتے رتی قہر ہنیری

چڑھ چتاں ایہہ اکھیں لگتیاں!

چڑھ چتاں ایہہ اکھیں لگتیاں

گیا روہی تے چرکا ساون، نہ تن کھمباں اگیاں  
چڑھ چتاں ایہہ اکھیں لگتیاں

سکے پر ڈھنگراں تے پھاتے کائی یا چینیاں گھگھیاں  
چڑھ چتاں ایہہ اکھیں لگتیاں

اساں بنے تے ویہندے رہ گئے کاواں کنکاں چکیاں  
چڑھ چتاں ایہہ اکھیں لگتیاں

رتی رت پوائی پئی اسماں وال نکل پئے کھگھیاں  
چڑھ چتاں ایہہ اکھیں لگتیاں

سانوں وی کجھ کھیڈن دیویں، توں سبھ بازیاں پگیاں  
چڑھ چتاں ایہہ اکھیں لگتیاں

بجر تیرے نال مول نہ رجن، تن دیاں تانگھاں لڈھیاں  
چڑھ چتاں ایہہ اکھیں لگتیاں

ہتھ پیلے پپلاں دے پتے

ہتھ پیلے پپلاں دے پتے

چٹیاں نیناں دے اندر نہ سورج غیبوں لتھے

ہتھ پیلے پپلاں دے پتے

رڑھ ساون دیاں آساں لائیاں لگ سمندر ستے

ہتھ پیلے پپلاں دے پتے

کاواں دے گھر خبراں آئیاں چڑیاں آہنے چھتے

ہتھ پیلے پپلاں دے پتے

کالی رُت وچ ککر بن گئے دُدھ ماواں دے متے  
ہتھ پیلے پپلاں دے پتے

توں چیتے آئیوں اج سانوں، تن ساہوال نال رتے  
ہتھ پیلے پپلاں دے پتے

## ماہی وے راتاں چاننیاں لنگھ گنیاں

ماہی وے راتاں چاننیاں لنگھ گنیاں

پُھل گلابی دُھپّ دھواکھے، رُتاں کالیاں تھنیاں

ماہی وے راتاں چاننیاں لنگھ گنیاں

پانیاں سجاں نوں ولیا، اسماں پنتاں تے بہہ رہیاں

ماہی وے راتاں چاننیاں لنگھ گنیاں

تن وچ پیلو نہ پکّیاں، روہی تے کنیاں پیاں

ماہی وے راتاں چاننیاں لنگھ گنیاں

## چر ساڈے باغاں وچ ہرناں

چر ساڈے باغاں وچ ہرنا

سانوں قسم تیری مستی دی، ہتھ نہیں تیں ول کرنا

چر ساڈے باغاں وچ ہرنا

اتوں تیں نال ہسناں، اندروں کالا ویلا جَرنا

چر ساڈے باغاں وچ ہرنا

سانول خشبو چکھے بھج بھج ریتاں اندر مرنا

چر ساڈے باغاں وچ ہرناں



جاگن ویلے ڈُبدیاں جانا نیندر دے وچ ترنا  
چر ساڈے باغاں وچ ہرنا

## ساڈی واری امب نہ پکے

ساڈی واری امب نہ پکے

چارے موسم ڈاڈھے تھکے، پنچواں نہ پیا تکے  
ساڈی واری امب نہ پکے

ندیاں ونج دریا نئیں وڑیاں، کھلے تاں رہے نکے  
ساڈی واری امب نہ پکے

جٹیاں کیویں مدانیاں پاون، کوئی گڑاھپ نہ وکے  
ساڈی واری امب نہ پکے

رات آئی تاں گھر دیاں بلیاں دُڈھ چٹورے لکے  
ساڈی واری امب نہ پکے

نال شریکاں وسدیاں ہسدیاں بھل گئے سانوں سکے  
ساڈی واری امب نہ پکے

روحاں دے خاباں تے چڑھ گئے رنگ جُسیاں دے ککے  
ساڈی واری امب نہ پکے

## ہرے باگاں دے گاہڑ مالی

ہرے باگاں دے گاہڑ مالی

سانوں ساریاں خیراں دتیاں سر اُتے بہہ لالی  
ہرے باگاں دے گاہڑ مالی

چُٹھے سُنیناں اُتے بہہ کے رات ہجر دی جالی  
ہرے باگاں دے گاہڑ مالی

کالک دا ڈھگت و دھن لگا جاں چُٹھے اگ بالی  
ہرے باگاں دے گاہڑ مالی

سُجڑے اندر آپے پُھلّی دُڈھل اک دی ڈالی  
ہرے باگاں دے گالھڑ مالی

متاں سُجان لوے کائی بوٹا، مارو باغ بھنوالی  
ہرے باگاں دے گالھڑ مالی

## ماہی وے تیری وسے بار

ماہی وے تیری وسے بار

کون اسانوں باہر بھنوائے، سنگٹری موکلی تھاہر  
ماہی وے تیری وسے بار

اساں منیاں نال چھے مارے گل سجن دریاؤں پار  
ماہی وے تیری وسے بار

ہتھوں چھوڑ مہاراں دتیاں لڈ چھمرے اٹھاں تے بھار  
ماہی وے تیری وسے بار

ساڈی واہی تے نہ لٹھی تَلنیراں دی کائی لمی ڈار  
ماہی وے تیری وسے بار

لُحَلے لُحَلے کوٹھے چڑھاں میں متاں مڑ آون یار  
ماہی وے تیری وسے بار

## مکدی نہیں جُتیاں دی دُوری

مکدی نہیں جُتیاں دی دُوری

سادى تانگھ جوانى والى اسان وىلے وچ پُرى  
مکدی نہیں جُتیاں دی دُوری

لال گلاباں خبراں گھلّیاں، تیری اکھ وئدی کستوری  
مکدی نہیں جُتیاں دی دُوری

سہا دیاں سکتیاں بدلاں وچوں جھڑگئی بجلی نوری  
مکدی نہیں جُتیاں دی دُوری



## فجر تھئی آئیاں نہ بانگاں

فجر تھئی آئیاں نہ بانگاں

رات دیاں ڈھلیاں انگاں وچ چڑیاں گڈیاں سانگاں  
فجر تھئی آئیاں نہ بانگاں

بھرے سیالے جم گئیاں جھکھڑ قدمالیاں کانگاں  
فجر تھئی آئیاں نہ بانگاں

سُتھرے مٹھیاں وچ چا پورے اپنے آنے نانگاں  
فجر تھئی آئیاں نہ بانگاں

من ساڈا تن اندر جاگے، تن وچ جاگن تاں گھاں  
نجر تھئی آئیاں نہ بانگاں

## روہی وچ تلیاں بلدیاں

روہی وچ تلیاں بلدیاں

مٹھیاں قداماں آلیاں گوکاں ماہریاں نوں نہ رلدیاں  
روہی وچ تلیاں بلدیاں

توں سٹی گھر چھوڑ گئیوں پر گنڈیاں رہیاں بلدیاں  
روہی وچ تلیاں بلدیاں

وکیہ، رتوکی تیج دیاں خشبوئیں ساہ وچ گلدیاں  
روہی وچ تلیاں بلدیاں

سانول ساآھوں مملیا آے اساء سینکیاء کولوں ملدیاں  
روہی وچ آلیاء بلدیاں

## بھوں گنیاں رتتاں کالڑیاں

بھوں گنیاں رتتاں کالڑیاں

سچ اُگے پکتو پر نچدے بھنھ رُکھاں دیاں جاڑیاں  
بھوں گنیاں رتتاں کالڑیاں

ڈھول سنیہڑا گھلّیا سانوں ست رنگیاں رومالڑیاں  
بھوں گنیاں رتتاں کالڑیاں

ہُن بھکھدے جگراتے کٹن ٹھنڈیاں سفنیاں والڑیاں  
بھوں گنیاں رتتاں کالڑیاں

ساڈے تن وچ سورج بنیاں ایہہ نیناں دیاں لالڑیاں  
بھوں گئیاں رتتاں کالڑیاں

اُڈ کوٹھے توں گُوڑے کاواں

اُڈ کوٹھے توں گُوڑے کاواں

ڈھول پناں تن ننگا میں تاں باہر آندی شرماواں

اُڈ کوٹھے توں گُوڑے کاواں

راتیں چٹیاں دھپاں لگن، دینھ نوں رات پچھاواں

اُڈ کوٹھے توں گُوڑے کاواں

بے ساہ ہٹ موسم وچ ستا، دھوڑ اُڈائی ساہنواں

اُڈ کوٹھے توں گُوڑے کاواں

سدا سجاگے نیناں دے وچ گھریاں خاب سراواں  
اڈ کوٹھے توں گُوڑے کاواں



## لہو ساڈے دی رنگت بگی

لہو ساڈے دی رنگت بگی

اساں سیاڑاں دے وچ، غرتے جاں وتر بھونیں دگی  
لہو ساڈے دی رنگت بگی

ناڑاں سیں گنیاں مٹھاں وچ، پسمی تاں رہی ڈھگی  
لہو ساڈے دی رنگت بگی

ہرکھ اُنہی اگے کھلڑی چار دیہاڑے تگی  
لہو ساڈے دی رنگت بگی

جیہڑی رمز دلاں وچ گُو کے، اوہ نیناں نے چکھئی  
لہوساڈے دی رنگت بگی

## لک پتلا سینہ بھارا

لک پتلا سینہ بھارا

لوے گلاباں جوین دے تن کھڑا دا حُسن انگارا

لک پتلا سینہ بھارا

تا نگھیں نوری وسوں و سدی، جھولی اتھا تارا

لک پتلا سینہ بھارا

اُپڑ بھونیں تے بوٹی پھلّی، لایا مُشک بُلارا

لک پتلا سینہ بھارا

لذت دی مستی وچ مٹھا لہو اساڈا کھارا  
لک پتلا سینہ بھارا

رمتیاں نظراں نے جا کیتا اسماناں وچ بارا  
لک پتلا سینہ بھارا

سُتیاں ساراں رات جگائیاں، ڈھول بھایا کارا  
لک پتلا سینہ بھارا

## واڑی وچ پکیاں پتیاں

واڑی وچ پکیاں پتیاں

دھرتی نے ساوے مہر دیاں رنج ویلاں سانوں دتیاں  
واڑی وچ پکیاں پتیاں

لے پاہرو چھوہر دیاں اج ہنگلاں تھنیاں چھتیاں  
واڑی وچ پکیاں پتیاں

رات پئی تاں بدل وچھ گئے چڑھ نہ سکیاں کھتیاں  
واڑی وچ پکیاں پتیاں

چُجھاں بھر بھر کے پکھوواں نے ساتھوں بازیاں جتیاں  
واڑی وچ پکیاں پتیاں

## اتواری کنکاں گدریاں

اتواری کنکاں گدریاں

چٹے شور سریریاں دے مکھڑے تے جمیاں ددّریاں  
اتواری کنکاں گدریاں

باہر نکل کے گھت لہیاں اساں گل سورج دیاں ددھریاں  
اتواری کنکاں گدریاں

پانی تاں اساں دل آندا، پیاں نہ کیتیاں پدھریاں  
اتواری کنکاں گدریاں

بُھکھے ڈھڈ گھڑ ولے اگے ساڈیاں ایہہ بے قدریاں  
اتواری کنکاں گدریاں



## پرنی نہ سکتیاں کواریاں

پرنی نہ سکتیاں کواریاں

سجرا سفنارات نہ آیا، آئیاں مونجھ مُنھاریاں  
پرنی نہ سکتیاں کواریاں

سوتے ویلے جاگ کھلوتیاں کیوں سینے دیاں بھاریاں  
پرنی نہ سکتیاں کواریاں

پار چنانہہ دے کیہڑا آکھے ”ماریاں مُڑاساں تاریاں“  
پرنی نہ سکتیاں کواریاں

سدھر بھوئیں تے چنبا گڈیا، بندرتاں دیاں باریاں  
پر نی نہ سکیاں کواریاں

## سانول نہ واگاں موڑیاں

سانول نہ واگاں موڑیاں

کیہناں شریکاں دے تھاناں دے بنھ سٹتا اے گھوڑیاں؟  
سانول نہ واگاں موڑیاں

سورج سو کے دے دریاواں ساڈیاں فصللاں بوڑیاں  
سانول نہ واگاں موڑیاں

برہوں دیاں کنڈیا لیاں گھڑیاں نیناں دے وچ پوڑیاں  
سانول نہ واگاں موڑیاں

اساں زبانی لکھ لکھ چٹھیاں جھکھڑاں دے وچ روڑھیاں  
سانول نہ واگاں موڑیاں

## روہی تے وٹھیاں کنیاں

روہی تے وٹھیاں کنیاں

سنی خشبو نے اسمائیں اڈنیاں چھتاں تیاں

روہی تے وٹھیاں کنیاں

پیلی نیندر وچوں نکلیاں ساویاں ساویاں مینیاں

روہی تے وٹھیاں کنیاں

پنل دے لانگھے تے ساڈیاں نویاں جھوکاں پیاں

روہی تے وٹھیاں کنیاں

تن اساڈے سرتے چائیاں من دیاں تاگلھاں گھنیاں  
روہی تے وٹھیاں کنیاں

## دیس رہیاں پردیسی ہو

دیس رہیاں پردیسی ہو

کالا اوجھڑ آس لگایا، نہ لانگھا نہ لو  
دیس رہیاں پردیسی ہو

عجب پہاڑ زراتا رہیا نیناں وچ کھلو  
دیس رہیاں پردیسی ہو

ساڈیاں سفنیاں وچوں اڈی آساں دی خشبو  
دیس رہیاں پردیسی ہو

برہوں جو بن میلا کتیا، سانول ہتھیں دھو  
دیس رہیاں پردیسی ہو



## آکملی دیا ڈھولا

آکملی دیا ڈھولا

جو بن تے پتھرا لکڑ گیا نماشیں چڑھ وے  
آکملی دیا ڈھولا

چکھاں بلدا سُنفا ڈٹھا نین کھلوتے سڑ وے  
آکملی دیا ڈھولا

برہوں رُت وچ رُوں رُوں ساڈا گیا سریریوں جھڑ وے  
آکملی دیا ڈھولا

روحاں دا بے رنگا سوکا باغاں وچ گیا وڑ وے  
آکھلی دیا ڈھولا

تھل تے بھوک وسائی اسماں ماییاں دے نل لڑ وے  
آکھلی دیا ڈھولا

## تن تنیا مکڑی دا جالا

تن تنیا مکڑی دا جالا

سفنے دے دُھکھدے دُھوں اندر خون رگاں دا کالا

تن تنیا مکڑی دا جالا

ماس وچالے ریتا وچھدی، ساہ دا پڑھدا نالا

تن تنیا مکڑی دا جالا

تالواڑک سُراں دا گُو کے لیتا دلیس نکالا

تن تنیا مکڑی دا جالا

لُوں لُوں وچ بے نگہی گرمی، روح بے ٹھنڈ سیالا  
تن تنیا مکڑی دا جالا

## مزے ثواب گناہ دے پھو کے

مزے ثواب گناہ دے پھو کے

ساون پیواں بھاویں ندیاں تن وچ آون سو کے  
مزے ثواب گناہ دے پھو کے

وجی لتھی تاں لفظاں اُتے چڑھ گئے پردے چو کے  
مزے ثواب گناہ دے پھو کے

موسم نے اسمان زمیں وچ بے رنگے رنگ ٹھو کے  
مزے ثواب گناہ دے پھو کے

نہاں اگے چھے دیکھن کون انہاں نوں روکے  
مزے ثواب گناہ دے پھو کے

ذات صفات پکیری نگی کر گئے خاب رتو کے  
مزے ثواب گناہ دے پھو کے

## اج من بے مستی مست پئی

اج من بے مستی مست پئی

چیتا، سدھر ہو رنگ دے، دھمی اساڈی کل جیہی

اج من بے مستی مست پئی

وہم تلا دی گاب دھگانے نیناں دے وچ گھت لئی

اج من بے مستی مست پئی

سُفنے دی جاں طلب نہیں تاں مُڑ نیندر دی مُونجھ کہی

اج من بے مستی مست پئی

دل دا ہرکھ مسافر ازلی، گلیاں اندر عمر گلی  
اج من بے مستی مست پئی

واس پکھیر ورج نہ مانیں، ساریاں باغاں دا قرضی  
اج من بے مستی مست پئی



گئے رُڑھ پٿن دریاواں دے

گئے رُڑھ پٿن دریاواں دے

بڑی دھاراں کیویں چنگھاون سُدے سینے ماواں دے  
گئے رُڑھ پٿن دریاواں دے

آہلنیاں وچ ستیاں پیاں پرتاں جھڑ گئے کاواں دے  
گئے رُڑھ پٿن دریاواں دے

چار کتاباں وچ نہ بولن حرف اساڈیاں ناواں دے  
گئے رُڑھ پٿن دریاواں دے

پتھروں مٹھڑے چشمے اُبھرے، جیوندے جسم گناہواں دے  
گئے رُڑھ پٲن دریاواں دے

سجناں دے سنگ نہیں پئے لہندے اندر نین سراواں دے  
گئے رُڑھ پٲن دریاواں دے

دل جردے رہے

دل جردے رہے

اساں کھیڈی کھیڈ نہ کائی تاں وی ہردے رہے  
دل جردے رہے

چُن پتھر سٹے کھائی، تاں وی تردے رہے  
دل جردے رہے

لکھ بولے بول خدائی تاں وی بردے رہے  
دل جردے رہے

ہرناں نوں پئی پھاہی تاں وی چردے رہے  
دل جردے رہے

سرنویں جوانی چائی تاں دی مردے رہے  
دل جردے رہے

## موت کملیئے سانوں سُونہہ دے جیون دی

موت کملیئے سانوں سُونہہ دے جیون دی

چڑی چرگئی تاگھاں اتوں، وبہل نہ ہتھ نوں سیون دی  
موت کملیئے سانوں سُونہہ دے جیون دی

کالی بھوئیں نوں چس پائی کس کھارا پانی پیون دی  
موت کملیئے سانوں سُونہہ دے جیون دی

فیصلہ رسن دا نہیں سوکھا، اوکھی رمز منیون دی  
موت کملیئے سانوں سُونہہ دے جیون دی

خوشی ڈھیلی پتھرا لی چُپ نوں اکھراں وچ لکھپون دی  
موت کملیئے سانوں سُونہہ دے جیون دی

اگوں جے ریت نبھیسن چوکاں وچ ٹنگپون دی  
موت کملیئے سانوں سُونہہ دے جیون دی

## سینے ککھ و ہماں دے رولن

سینے ککھ و ہماں دے رولن

نجر ہنیرے کالے پتر دین دیاں رمزاں کھولن  
سینے ککھ و ہماں دے رولن

دھرتی پیٹھ سمندر گنگے، ست اسمان نہ بولن  
سینے ککھ و ہماں دے رولن

تن من ہک دوجے توں نکھرنواں وجود اساڈا گولن  
سینے ککھ و ہماں دے رولن

لفظاں وچ سفیری بچھ گئی، انگلاں سیاہی پھولن  
سینے ککھ و ہماں دے رولن



## ویلا سچا سچ ڈھولنا

ویلا سچا سچ ڈھولنا

پتھرا لی شہری ماڑی دیاں اٹاں دے وچ گچ ڈھولنا  
ویلا سچا سچ ڈھولنا

ہتھ لاون تے بھردی ویندی خلقت کچا کچ ڈھولنا  
ویلا سچا سچ ڈھولنا

لکھ سینے دے سڑدے ناہیں، ڈاڈھا مچدا مچ ڈھولنا  
ویلا سچا سچ ڈھولنا

نچ سکیتیں تاں بھرے بزاریں رونا رونا نچ ڈھولنا  
ویلا سچا سچ ڈھولنا

## ساڈیاں گُدا ناں وچ پھکتیاں کلیاں

ساڈیاں گُدا ناں وچ پھکتیاں کلیاں

اساں کواریاں شہر دیاں تے سفنیاں سنگ ہکلیاں  
ساڈیاں گُدا ناں وچ پھکتیاں کلیاں

من جی بدرنگی گھر دیاں چارے کتیاں ملیاں  
ساڈیاں گُدا ناں وچ پھکتیاں کلیاں

نہ ہسن نہ روون بھاوے، وڑ چلے وچ کھلیاں  
ساڈیاں گُدا ناں وچ پھکتیاں کلیاں

رَت وچ کيہا سمندری چان، کالیاں پائیاں پلپیاں  
ساڈیاں گُلداناں وچ پھکتیاں کلیاں

## کیہا جو بن دا مان

کیہا جو بن دا مان

نہ ساڈے پیراں پٹھ دھرتی، نہ سرتے آسمان  
کیہا جو بن دا مان

لکھاں پھٹیاں شکلاں وچ نہ آپی رہی سُنجان  
کیہا جو بن دا مان

بُھر بُھر جُشہ تیلہ رہ گیا چڑھ لذتاں دی سان  
کیہا جو بن دا مان

سورج سُننے توں ڈر سُنّے چھاواں تنبوتان

کیہا جو بن دا مان

نہ کوئی کُفر سلامت ساڈا نہ کوئی شوق ایمان

کیہا جو بن دا مان

## کالی کوئل کالی گُوک نہ مار

کالی کوئل کالی گُوک نہ مار

اتواری باگیں نہ پھلے بھاویں لال انار  
کالی کوئل کالی گُوک نہ مار

جیون خشبو دھرتی ہیٹھاں وچ پانی وچ گار  
کالی کوئل کالی گُوک نہ مار

ہری ہواتے ٹھہدی آسی سکھ ساون دی ڈار  
کالی کوئل کالی گُوک نہ مار

بالاں دے گاؤن دا پوسی گلیاں وچ گھمکار  
کالی کوئل کالی گوک نہ مار

کواریاں مٹھتیاں لاٹاں، گھبرو چکھسن لذت دھار  
کالی کوئل کالی گوک نہ مار



## دعا ساتھوں نہ جاندى منگى

دعا ساتھوں نہ جاندى منگى

سوا نيزے تے سورج بيٹھا بھونیں نوں ماراڑنگى  
دعا ساتھوں نہ جاندى منگى

بھوریاں وہاں وچ پگھڑ کے چربی ہوگى ننگى  
دعا ساتھوں نہ جاندى منگى

سارياں مندیاں توں نس آئے ہتھ نہ آئی چنگى  
دعا ساتھوں نہ جاندى منگى

دھمی تے کل وِسِر گئے جاں پھاتے اج دی جھنگی  
دعا ساتھوں نہ جاندی منگی

ترٹھے منکھڑیاں وِچ وسدی نہ دُکھ رنگی نہ سَکھ رنگی  
دعا ساتھوں نہ جاندی منگی

## آن چکھیا جو بن گھسدا

آن چکھیا جو بن گھسدا

بے پردہ پئے جئے دا جھولا روح وچ وسدا  
آن چکھیا جو بن گھسدا

راتیں دل ماہی نال سوندا، دے اسماں ول نسدا  
آن چکھیا جو بن گھسدا

سُفنے وچ اُس نوں پُٹھاں تاں مزا ودھیر تسدا  
آن چکھیا جو بن گھسدا

اڈھ وجودے رہ جاون دا جھورا متھڑے ہسدا  
آن چکھیا جو بن گھسدا

## کالے کرشنا تیریاں نسلوں پھٹیاں

کالے کرشنا تیریاں نسلوں پھٹیاں

لاکھی چان لالی بھر گئی شکلاں چٹیاں چٹیاں  
کالے کرشنا تیریاں نسلوں پھٹیاں

سستی بدلی سورج اگے، داناں باجھوں سٹیاں  
کالے کرشنا تیریاں نسلوں پھٹیاں

ساوول خشبو پیٹھ اُتانی، اُتے لشکن مٹیاں  
کالے کرشنا تیریاں نسلوں پھٹیاں

ہسنگلانڈے چیتے وچ جاگن تیریاں رمزاں مٹھیاں  
کالے کرشنا تیریاں نسلاں پھٹیاں

## دھمی لال پہاڑاں گھلی

دھمی لال پہاڑاں گھلی

چُپ چنبیلی نے وسوں وچ رکرڈ لفظاں دی چھاں ملی  
دھمی لال پہاڑاں گھلی

ازلی جھکّاں دے پانی تے اچھکّی ہوا سمندری بلی  
دھمی لال پہاڑاں گھلی

اسماناں دی موت زمینی نیئاں ہس ہس جھلّی  
دھمی لال پہاڑاں گھلی

کنبدے پتھر سینے وچوں آب حیاتی نیس پئی چلی  
دھمی لال پہاڑاں گھلی

چھوہر مہانے دے گاؤن وچ سُر موسم دی رتی  
دھمی لال پہاڑاں گھلی



ساڈے ویلے لگی پیوند گلاباں نوں

ساڈے ویلے لگی پیوند گلاباں نوں

نکیاں ہتھاں خوش ہو بدھا گملیاں اندر باگاں نوں  
ساڈے ویلے لگی پیوند گلاباں نوں

کملی کونل رنتوں کالی، سینے گھٹیوس راگاں نوں  
ساڈے ویلے لگی پیوند گلاباں نوں

خشبونیاں دے نین نہ جھلے بے جٹہ جیہے خاباں نوں  
ساڈے ویلے لگی پیوند گلاباں نوں

ساڈی بے سرتی دی ساری سار بہشتی ناگاں نوں  
ساڈے ویلے لگی پیوند گلاباں نوں

”گن“ اگے بے وستی منی؟ متونال عذاباں نوں  
ساڈے ویلے لگی پیوند گلاباں نوں

## سر ساڈے تے چام چڑکاں

سر ساڈے تے..... چام چڑکاں

چھپراں دے ڈھڈ کھپرا بیٹھا، تن باہر دیاں سگّاں  
سر ساڈے تے چام چڑکاں

وطن اسانوں بردا جاتا، ونج پردیسیں وگاں  
سر ساڈے تے چام چڑکاں

پچھے ہرکھ پہاڑ کھلوتا، اگے ڈر دیاں جھگّاں  
سر ساڈے تے چام چڑکاں

اتوں اسمانون نوں ڈھاواں، تلیوں دھرتی چھکّاں  
سر ساڈے تے چام چڑکّاں

## نیناں کتھوں سُننے مانن

نیناں کتھوں سُننے مانن

راتیں پہرے دار جگاون، دِنے جگاوے چان  
نیناں کتھوں سُننے مانن

پوہ اٹھرائیاں لوٹھاں اُتے سدھراں لبو تان  
نیناں کتھوں سُننے مانن

ماس اساڈے گار سمائی، لُوں کھپے نہ چھانن  
نیناں کتھوں سُننے مانن

سکھّے لفظِ دِلوں نہ بھلدے، جو بھلن سو جان  
نیناں کتھوں سُنّے مان

سدا اُنیندِری نیندر اندر رَمزاں بھورے وہم چچھان  
نیناں کتھوں سُنّے مان

## کالے پتر اناراں دے

کالے پتر اناراں دے

تن برڈٹی کڑکے اندر بھڑدے گچ پہاڑاں دے

کالے پتر اناراں دے

کوڑے پھکے، لُونے مٹھے مزے زمیں دیاں دھاراں دے

کالے پتر اناراں دے

سے ان سُونہے چُپ زمانے وچ دلاں دیاں ساراں دے

کالے پتر اناراں دے

تیرے ویڑھے توں نہ اُڈدے لال کبوتر ڈاراں دے  
کالے پتر اناراں دے

فتح اساڈی توں اگدوں، سے وقت اساڈیاں ہاراں دے  
کالے پتر اناراں دے



## چچو چچ گنڈیریاں

چچو چچ گنڈیریاں

لال ہنیری وچ وٹیاں، دو تیریاں دو میریاں

چچو چچ گنڈیریاں

نندر اپنے ہتھیں لاوے خاب کلر دیاں ڈھیریاں

چچو چچ گنڈیریاں

واء ورولیاں ساہ، وچ گھتیاں بے ساہ گھٹمن گھیریاں

چچو چچ گنڈیریاں

ماپیاں دے تھاناں تے ہنکن ابلق نہس وچھیریاں  
چچو چچ گنڈیریاں

## دِن ماہی جو بن بدرنگا

دِن ماہی جو بن بدرنگا

میل وجودیں پانی بھارا جاں میں دھاتی گنگا

دِن ماہی جو بن بدرنگا

تاکھی مُونجھ اڈاری پھاتی، نیناں دا پیا ونگا

دِن ماہی جو بن بدرنگا

تیرے ساہ نال مہکی ٹھنڈکوں پھل گلابی چنگا

دِن ماہی جو بن بدرنگا

تیرے ہتھیں سورج بھکھدا، ساڈا برف درھنکا  
دن ماہی جو بن بدرنگا

## تانگھیں وسدا ساون ساون

تانگھیں وسدا ساون ساون

سانولیاں سُلگی رت بھٹی مستی نال نہاوان  
تانگھیں وسدا ساون ساون

دل دریا اُتے مرغائیاں پار سمندر آون  
تانگھیں وسدا ساون ساون

ماواں دے ساوے سینے نہ دُڈھ خشبوئیں ماون  
تانگھیں وسدا ساون ساون

پھلاں دی سنگت وچ جھولے راگ رنگت دے گاؤن  
تنگھیں وسدا ساؤن ساؤن

سجرے آب حیاتی اندر جاتک جیون جوگ کماؤن  
تنگھیں وسدا ساؤن ساؤن

## شالا دل عاشق نہ تھیوے

شالا دل عاشق نہ تھیوے

لفظاں دے سنگ مردا رہندا، چیزاں اندر جیوے  
شالا دل عاشق نہ تھیوے

نیناں دا تھل قاتل ساہ دی لال ہنیری پیوے  
شالا دل عاشق نہ تھیوے

اپنی ذات صفاتوں باہر اپنی ذات دکھیوے  
شالا دل عاشق نہ تھیوے

کنبدے شور حیاتی پچھے چُپ دی کڑک سُنیوے  
شالا دل عاشق نہ تھیوے

تیرے ناں دی بھاری مستی تن توں کوں چکھوے  
شالا دل عاشق نہ تھیوے



## آماہی تینوں سینے لاواں

آماہی تینوں سینے لاواں

نین بچے بُر پیا آتے مٹھیاں تھنیاں چھاواں  
آماہی تینوں سینے لاواں

ماس ہنیرے تے چڑھ آئیاں چانن بھریاں باہواں  
آماہی تینوں سینے لاواں

بھکھدے لہواچ شور کریندیاں رتیاں حرص ہواواں  
آماہی تینوں سینے لاواں

آون والا پل مستى اے، وچ ميں ڈبدي جاواں  
آماہي تنيوں سينے لاواں

## نیلیاں بدلاں جھڑیاں لائیاں

نیلیاں بدلاں جھڑیاں لائیاں

گھلی ہوا توں کنیاں نے دھدّ دیاں چھتاں ڈھائیاں  
نیلیاں بدلاں جھڑیاں لائیاں

روح دی بے جُستہ مستی نوں تن دیاں مُونجھاں آئیاں  
نیلیاں بدلاں جھڑیاں لائیاں

سانولیاں دے سِنے نینیں طمع دیاں تپیاں رشنائیاں  
نیلیاں بدلاں جھڑیاں لائیاں

غیباں دے نئے گھمکاراں راتاں سُفنیوں آن جگائیاں  
نیلیاں بدلاں جھڑیاں لائیاں

## نیناں وچ جاگے اسمان

نیناں وچ جاگے اسمان

ظاہر باطن روپ حسن وچ، ازلاں دے مستان  
نیناں وچ جاگے اسمان

نظر تیری تے رنگ وحی دا ساڈی بخشش کان  
نیناں وچ جاگے اسمان

ہانہہ دی بھاری کنینی چکھے کرشن مریندا تان  
نیناں وچ جاگے اسمان

برفیں پھاتے لوں لوں اُتے سیک چڑھاوے پان  
نیناں وچ جاگے اسمان

تیرا ہجر دھیان اسمانوں، تیرا وصل گیان  
نیناں وچ جاگے اسمان

## سانول کون دلاں نوں موڑے

سانول کون دلاں نوں موڑے

اندر رمزاں، باہر رمزاں، ساڈے رمزاں نال وچھوڑے  
سانول کون دلاں نوں موڑے

سکھئی ہوش دیاں لذتاں وچ کتنے زہر نظارے پوڑے  
سانول کون دلاں نوں موڑے

آدم بودی کڑک شہر نوں بجل ہڑ وچ روہڑے  
سانول کون دلاں نوں موڑے

خاهاں دے رنگ چڑھے زمانے مُشکلی سورج نے آتوڑے  
سانول کون دلاں نوں موڑے